

吾舅姆係台北外省人，十九歲就嫁到吾屋下。

有一擺佢來台中祭，吾姆渡佢去埔里，分舅姆個福氣，厓乜有好跔，先去「牛耳石雕公園」看落雪個油桐花，風一來桐花落落跌，舅姆臥起頭來看到呆(ngoi v)忒：「仰會恁靚哪？一生人就毋識看過恁靚個花。」舅姆兩隻手巴掌伸出來承桐花，緊講：「還好哪！仰會逐蕊就恁萋啱？」佢捧等花拿到鼻公頭鼻香，幹頭摺吾姆講：「有略略仔香香呢，你兩儕鼻看哪！」看著舅姆個鼻公黏等當多花粉，吾姆摺厓笑到哈哈滾，連樹頂個鳥仔、脣頂個揚蝶仔、天頂個雲乜笑到換換轉，吾姆拿出衛生紙定定仔摺舅姆擗鼻公個花粉，舅姆逐朝晨跔(hong)床鼻公就會過敏，這下花粉黏著鼻公，連連哈啾噴天，摺承著個桐花嚇走淨淨。

厓兜行到公園個崩崗前，這位看得著遠遠個山，層層疊疊峰峰相連，深深淺淺個青色當好看，像月曆頂個一幅圖樣仔，風景當靚，舅姆看著遠遠該位有一棟屋仔，就問講：「該山頂仰會起一間博物館呢？」厓摺阿姆看來看去就無看著博物館，就問舅姆：「你算來講個博物館在兩位？」舅姆手伸長長比幾下重山後背該棟屋仔，厓摺阿姆又笑到目汁跌下來，吾姆緊擗目汁緊講：「該係『中台禪寺』，毋係麼個博物館啦。」舅姆自家乜哈哈大笑。

車仔行過埔里大路項，舅姆又問：「唉哦！這兜台中個禾仔仰會恁大頭？該打個穀毋就食一粒米就飽了。」厓兩子哀乜無管客運巴士頂人恁多，實在忍毋核，笑到毋會停動，歸車人都緊看厓兜，正經會分吾舅姆打橫，又定定仔同佢解釋，該係筊筊毋係禾仔，正講煞佢又看著奇巧個東西：「該田肚有一隻羊仔，還大隻喔！」厓兩子哀又笑到鼻流鼻串，無法度好應舅姆。

吾舅姆自嫁到吾屋下來，因爭吾姐公有講：「轉到屋入吾門，定著愛講客話。」吾舅姆實在有慶，一個外省人在台北出世台北大，食到恁大毋識堵著客人，無想著會嫁分客人，佢就摺正學講話個細人仔嘍嘍嘍學客話，這一路來埔里，做盡歸路仔講客，故所巴士頂坐車個人旦旦聽毋識，話著厓三儕係神經有問題乜無定著，頭下舅姆看著該隻大羊仔，係在田坵耕田個水牛，烏色個，舅姆單淨識在書項看過羊仔係烏色個，毋知佢幾大隻，正會恠差代，fud 毋著哩！

吾姆較開明，輒輒講：「有閒愛渡細人仔出去遠山花，行行祭祭仔，正毋會麼個就毋識，羊角看做蓮花。」這乜係有一擺舅姆摺吾姆去台南官田祭，看著歸坵田就係青色個蓮花葉，緊問吾姆：「厓自從毋識看過青色個蓮花，蓮花旦勢係水紅色個，無就係白色個，仰會這位個蓮花做盡係青色個啱？」下後，有人講著「羊角看做蓮花」吾歸屋家人就會哈哈大笑，這係吾屋下食飽飯講古個笑科之一。

「人不可貌相，海水不可斗量」，吾舅姆係一個當慶個婦人家，吾姐婆個手路菜，四炆四炒，蒸板、打菜包，逐項佢就曉得，連拜阿公婆、掛紙個性儀，佢乜會，下把仔還有後生新入門個心白來問佢呢，還慶喔！

2018.5.1 在大墩木棉樹下